



Komunikadu Imprensa 26 Juñu 2024

Komunidade Suku Triloca, Munisípiu Baukau preokupa ho labarik sira abandonadu nia-direitu

JSMP, iha 21 Juñu 2024, fahe informasaun kona-ba asesu justisa formál, direitu labarik sira-nian no serbisu rede referral ba membru Konsellu Suku no komunidade sira iha Suku Triloca, Postu Administrativu Baukau Vila, Munisípiu Baukau. Totál partisipante hamutuk ema na'in 31 ne'ebé kompostu hosi mane 21 no feto 10.

“Atividade fahe informasaun ka treinamentu ida ne'e nu'udar kontribuisaun JSMP nian hodi hasa'e koñesimentu no konsiênsia komunidade sira-nian iha termu asegura ema hothotu nia direitu atu asesu ba justisa formál no mós bele asegura protesau no promosaun ne'ebé másimu ba direitu labarik sira-nian tuir Konstituisaun no lei haruka”, dehan Sra. Ana Paula Marçal, Diretora Ezekutiva JSMP.

Xefe Suku Triloca, Sr. Reinaldo N. da Silva iha nia liafuan abertura ba atividade ne'e, agradece ba JSMP tanba mézmuke nia husu ka halo pedidu verbal de'it durante halo entrevista iha nia suku kona-ba serbisu rede referral nian, maibé JSMP konsidera hodi bele ba fahe informasaun relevante iha nia Konsellu Suku no mós membru komunidade sira. Nia husu ba partisipante sira atu partisipa ho di'ak hodi aprende netik buat ruma nune'e bele aplika ka uza iha sira-nia serbisu lorloron no mós bele hatutan tan ba membru komunidade sira ne'ebé la partisipa iha treinamentu ne'e.

Informasaun espesífiku ne'ebé JSMP fahe iha atividade ne'e mak kona-ba sistema justisa iha Timor-Leste, kna'ar sira hosi autór judisiáriu sira hanesan juis, prokuradór, defensor no advogadu privadu sira, direitu labarik sira nian tuir Konvensaun Direitu Labarik sira-nian, Konstituisaun no lei sira, tipu krime, oinsa refere kazu no mós kona-ba rede referral.

Kestaun prinsipál sira ne'ebé partisipante sira foti durante diskusaun mak kona-ba labarik sira ne'ebé abandonadu tanba inan ho aman fahe malu ka divórsiu oinsa sira bele iha kondisaun hodi kontinua asesu ba edukasaun ka eskola, kestaun kona-ba labarik sira envolve iha krime, lei asegura ona sira-nia direitu, maibé bainhira sira envolve iha krime, oinsa bele rezolve ida ne'e. Kestaun violénsia bazeia ba jéneru, liuliu Violénsia Doméstika (VD) ne'ebé bainhira lori ba tribunál, ikus mai divórsiu no oan sira mak sai vítima.

Hatan ba kestaun sira ne'e, JSMP esplika katak ba labarik sira ne'ebé inan-aman fahe malu ka divórsiu, lei nafatin kesi no obriga inan ho aman atu responsabiliza ba sira



hahú kedas ho alimentasaun ka fó han to'o ba iha eskola ne'ebé sai nu'udar responsabilidade sivil (Artigu 1877 KS). Bainhira inan-aman lakohi foti responsabilidade ida ne'e, sira bele komete ona krime la halotuir obrigasaun alimentár (Artigu 225 KP) no krime abandonu (Artigu 143 KP). Nune'e, inan-aman sei la livre hosi responsabilidade ba oan sira bainhira divórsiu. Alende ne'e, labarik sira ne'e tama ona iha categoria grupu vulnerável no presiza apoiu espesial mós hosi Estadu hanesan fó bolsu estudu ba sira, importante mak autoridade lokál sira tenke relata ka informa ba liña ministerial relevante sira atu bele hetan apoiu.

Relasiona ho kestaun labarik sira envolve iha krime, JSMP esplika katak tuir Lei Penál, labarik sira (menus hosi idade tinan 16) seidak iha responsabilidade kriminál ka imputabilidade (Artigu 20 KP), nune'e, bainhira sira envolve iha krime, sei la prosesu ka julga sira iha tribunál, maibé bele reablita sira molok haruka filafali ba sira-nia família no comunidade.

Kestaun VD ne'ebé rezulta divórsiu no oan sira sai vítima tanba inan-aman husik hela sira, JSMP esplika katak kazu VD nu'udar kazu ne'ebé barak liu rejista no prosesa iha tribunál iha kada tinan tuir dadus ne'ebé JSMP monitoriza. Maneira ida atu prevene no kombat violénsia ida ne'e mak ho kriminaliza aktu ne'e no prosesa iha tribunál, mézmuke ikus mai rezulta divórsiu. Mezmu nune'e, inan aman sei nafatin iha responsabilidade ba oan sira hanesan esplika tiha ona antes.

Xefe Suku Triloca, Sr. Reinaldo N. da Silva ho nia membru Konsellu Suku sira sente haksolok ho treinamentu ne'e tanba sira bele aprende buat foun ruma ne'ebé importante no relevante hodi uza iha hala'o sira-nia knaar iha sira-nia comunidade tanba sira hanesan ema foun hotu no seidak tuir formasaun ka treinamentu ruma kona-ba matéria sira ne'ebé JSMP fahe ne'e.

Atividade ne'e realiza ho apoiu finanseiru hosi USAID Advocacy Activity/CPI

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl

Rua Beco Lakateu, Aldeia Manufuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
ana@jsmp.tl

Facebook: www.facebook.com/timorleste.jsmp

Twitter: @JSMPtl